



UNIVERSITÄTS-
BIBLIOTHEK
PADERBORN

Universitätsbibliothek Paderborn

**De Monstris Et Monstrosis, Qvam Mirabilis, Bonvs, Et
Ivstvs, In Mvndo Administrando, Sit Devs, Monstrantibvs**

Stengel, Georg

Ingolstadij, 1647

§. 3. Naturæ authoris esse rerum naturis cursum suum relinquere.

[urn:nbn:de:hbz:466:1-51168](https://nbn-resolving.org/urn:nbn:de:hbz:466:1-51168)

aëris est potestas in ferrum, cur non sit
etiam in hominis corpus, vt illud vel con-
trahât, vel extendat?

§. III.

*Natura Authoris esse, rerum naturis cursum
suum relinquere.*

Ob hæc cum perspicuum fiat, regionî,
vel climati sæpe talia esse ascribenda, ex
ordine vtique faciet Naturæ vniuersique
Author, si alibi in hominibus breuitatem,
longitudinem alibi, alibi exhibeat medio-
critatem. Ita qui topiariam faciunt, in
hortis, alio loco humi nascentia fraga,
aut thymum vix è terra eminentem, alio
altiùs se erigentem rorem marinum, alio
ficum caput supra hæc longè efferentem,
alio adhuc celsius prospicientè pyrum ce-
rasumq; , alio denique longissimè vmbra
proijcientè cedrum conserunt prætexunt-
que. Sic per Naturam ludit, in orbe ter-
rarum, diuina sapientia, dum in vna regi-
one producit arcuatis pedibus depressos
pumiliones; in alia staturæ vtitioris ho-
mines; in alia demum gigantes capita al-
ta ferentes. Hoc naturæ ius est; hæc cæli
vis & potentia; istud telluris ingenium,
quod Auditor cæli, terræ, ac totius naturæ

non magis debet impedire, quàm ne alia regio calida, alia frigida, alia sicca, humida alia existat: aut ne alia arbor poma, alia pruna ferat. Non est tam sapientis Architec̃ti, velle Momo satisfacere; aut cauere, ne Veneris sandalium carpat. Quare neq; alia, quæ in humano corpore censentur subinde vitiosa, vt arceat communis Mundi Rector, est exigendum. Si arceret, cursui rerum naturisq; ipsis manum frænumque iniiceret, & vim, quam dedit, retractaret. Aliud est, in Tibure, aliud in Sardinia esse; aliud nigrescere in Hispania, albescere in Polonia; aliud in montibus, aliud in vallibus; aliud in terris, aliud in mari degere. Tradit Soranus Ephesius, mulieres, quæ in nauibus pariunt, mutum parere; quod siue intelligatur de perpetuò mutis (quod non credo) siue non vagientibus, sed tantùm mutientibus, aut præ tumultu fluctuumq; collisione non auditis, cum nascuntur. Auctor maris non debet mare ipsum, cuius tantus est in Mundo vsus, cū procellis suis è medio tollere. Pari pacto sunt fontes & aquæ, in nonnullis regionibus, admodùm salutare, si quidem rectè vsurpentur, quæ tamen

Soran.
Itagoge
171

tamen strumosos efficiunt incautiùs bibentes. Num igitur vniuersi Conditor fontes obstruere, riuos claudere, fluuios auertere debet? Enimuerò non debet. Esto viri feminaeque inde strumas, tamquam carneas quasdam crumenas, è collo dependulas, gutturalemque & ingratè pinguem, quamdam absonae vocis ruditatem nanciscantur. Vitium deforme nobis videtur esse struma, fateor, & vel regia manu, non sine prodigio, aut gratia gratis data, sanandum; sed num idcirco vel sal, vel metalla, vel lapides, quorum allapsu aquae vim medicinalem trahunt, in nihilum redigenda sunt? Tum profectò & ipsae aquae erunt è Mundo eliminandae, ne ignem, immò hominem extinguant in eas incidentem. Stultissimi sunt mortales, qui rem vtilem nolunt pati, quia nocere potest male usurpata.

§. IV.

Cur alia alibi monstrosa, vel non monstrosa videantur?

Moneor hìc, vt & illud obseruem, saepe fieri consuetudine, vt res deformes non deformes, sed decentes videantur. Vnde desinunt haberi pro mōstris. Vt enim simi-